

北京圖書館 編

北京圖書館藏珍本
年譜
叢刊



第 45 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 45 冊



第四十五冊目錄

蓉川公年譜	一
王心齋先生年譜	二七
石頭錄	八五
楊文憲升庵先生年譜	四八七
明修撰楊升菴先生年譜	五三七
升菴先生年譜	六四一
文裕公年譜	六六三
烏拉哈噶貝勒幹達善年譜	七〇一
龍峰先生年譜	七〇七
王父雲塘先生年譜	七二七

欽定明史列傳

齊之鸞字瑞卿桐城人正德六年進士改庶吉士授刑科給事中疏劾三邊總督陳天祥爲御史時嘗受餽及爲副使嘗濫殺宜賜罷黜不從十一年冬帝將於京城西偏置肆之鸞上言近聞有花酒舖之設人言籍籍或云車駕將臨幸或云朝廷實收其息陛下貴爲天子富有四海乃至競錐刀之利如倡優館舍乎應州奏捷帝臣勅稱總督軍務威武大將軍總兵官朱壽勦寇有功宜特加公爵制下舉朝大駭之鸞偕同官諫曰自古天子亦有親臨戰陣戡定禍亂者成功之後不過南面受

賀勒之金石播之歌頌已耳未有加爵酬勞如今日之顛倒者陛下何所取義爲此不祥之舉以駭天下之耳目貽百世之譏誚也皆不報未幾請召還編修王思給事中張原陳鼎御史周廣高公韶李熙徐文華李穩施儒劉寓生僉事韓邦奇評事羅僑不聽復偕同官上言大學士楊廷和蔣冕毛紀居師保之重身係安危邇者勅諭中外將有邊塞之役三臣先後稱疾比至駕行竟不一出今六飛臨邊且踰月矣宗廟社稷百官萬姓寄空城之中人心危疑幾務叢積猶復杜門高臥以求決去居守之事將誰是託萬一事起倉卒大疑無所取決

至于僨敗三臣將何辭以謝天下乞陛下以社稷爲重
亟返宸居與大臣共圖政理御史李潤等亦奏之俱不
省之鸞再遷兵科左給事中中官馬永成死詔授其家
九十餘人官之鸞上言永成貴顯用事十有餘年兄弟
子姓皆都高爵美官而其儕趙亨復爲陳乞將及百人
不知永成何功而非分之恩濫無紀極如此臣恐天下
聞而解體不報十四年三月帝將南巡舉朝憂懼之鸞
偕六科諸臣御史楊秉忠偕十三道諸臣交章力諫章
入二日未報之鸞等不知所出乃相率伏闕俟命自辰
至申帝令中官傳諭乃退明日託疾免朝欲以爲之鸞

等罪會諸曹黃輦等聯章力諫乃止不行頃之御史蕭淮發寧王宸濠不軌狀錢寧輩陰尼之之鸞請遣大臣按問得報可已而宸濠反張忠許泰等南征命之鸞偕左給事中祝續從軍紀功未至而賊已滅羣小忌王守仁譖毀百端之鸞力白其誣忠泰廣搜逆黨無辜株連者甚衆之鸞多所開釋疏陳軍民之困請蠲田租停力役寬逋負帝頗採納之鸞初徐姓至是始復焉世宗踐阼首言陛下入自藩國續承丕基正人心望治之日然內外臣工方翫愒於久安祖宗法制悉紛更於羣小今日補救之道惟在先定聖志次廣言路庶其有濟先朝

元兇今雖已去顧其根據盤互連蔓滋多猶恐巧相營
結或邀定策之賞或假迎扈之勞以取憐固寵天下事
豈堪若輩更壞臣以是懼聖志之未定也今之言者久
遏於權奸蔽抑之餘而欲吐其忠鯁懣憤之氣必有不
顧忌諱至於逆耳者此在嘉納而優容之若稍或抑裁
則小人又乘之以讎害忠直言路一塞不可復開大爲
新政之累矣臣是以又懼言者之過激也更乞陛下獨
秉乾斷文武大臣之不肖及非軍功冒封拜者卽賜罷
黜復覈先朝佞倖諸奸寘之於法舉邇年紛更變亂之
政盡返其初庶中興之烈爲章章也帝嘉納之又劾許

泰及兵部尙書王憲二人竟獲譴其秋大計京官有惡
之鸞者中之謫崇德丞屢遷寧夏僉事道中見饑民採
蓬子爲食惻然傷之因爲二封一進於帝一以貽閣臣
請發粟賑貸且言時事可憂者三可惜者四語極愷切
帝付之所司時方大修邊牆命之鸞董役巡撫胡東臬
稱其能舉以自代歷河南山東副使召爲順天府丞會
盜發其地留故任鎮撫尋擢河南按察使卒官之鸞居
諫職最號敢言及出所居官皆有聲云

蓉川先生小傳

里人周京撰

先生名之鸞字瑞卿姓齊氏蓉川其別號也元季有諱
天富者有所避忌自濠梁來桐城改姓徐氏三傳而爲
經歷良相娶劉氏子朝美諱瑩娶金氏成化癸卯正月
初八日巳時育先生於縣市西南隅太平坊之舊第聰
警夙成沈厚方雅年十五六鄉先達袁太僕公宏見其
術業器宇奇之許妻以女遊邑庠習毛氏詩丁卯提學
陳玉籌先生首選應試中應天府鄉貢明年試南宮未
利卒業南雍大爲大司成許公石公稱許越辛未復上
京師朝美與之偕中會試刻程文行天下桐城中會試

先此曾未有刻程文者有之實自瑞卿始廷試賜進士出身選翰林院庶吉士入讀中秘書桐城中進士先此曾未有入翰林爲庶吉士者有之亦自瑞卿始無何朝美以疾卒於京邸扶櫬南葬服闋拜刑科給事中三載績成勅贈朝美如其官母封太孺人妻封孺人轉吏科右給事中隨轉兵科左給事中扈從南征紀功先是當武皇用兵征討北邊儲位久虛車駕屢外幸權貴多乞恩轉陞大壞祖宗武選之法封駁奏論無虛日屢請回鑾建儲伏闕諫止南巡攻發銓司諸弊及至紀功又大忤貴倖與用事大臣論事又多不合今皇帝入繼大統

未幾例當考察因謫嘉興之崇德丞大司馬彭幸庵雪其枉復移湖之長興令尋陞山東青州府同知蒞任甫三閱月丁金太孺人憂服闋丁亥賜環改南京刑部四川司郎中鄉史氏曰瑞卿在太學時文名已四播然亦以其舉業文章云爾及登甲科入詞林曾未幾時卽致舒閣大手筆闡發其尊甫潛隱之德而鄉評始多其有顯揚之孝迨其居諫垣六七年間先後論列功效勸諫持國是而監國本憂君危而慮患深不遺餘力而宸濠不軌之謀實惟先發凡所上章疏無慮數千萬言率皆明白而不詭正當而不煩溫厚而不激和平而不刻得

古論諫之體及其謫也無戚嗟之聲無不平之色平易
近民振作士氣養不後教士服而民懷又有古良吏之
風而壬午寓考浙藩鄉試又識拔解元鄭曉與他舉者
一皆允愜士論自其始遷之祖當天造草昧之時姓齊
爲徐已歷六世向以軍籍例格改正至是始奏復之論
者亦稱其至誠無妄之學其譽才賢之士吃吃不離口
惟恐人之不知於布衣貧賤之交久而能敬絕無顯晦
之別其作古文辭欲駕韓歐而上薄周秦西漢之作其
作詩賦近體諸作欲沿屈宋漢魏盛唐而庶幾三百篇
之風至于操觚染翰彷彿二王丰骨書啟東劉情致勤

懇而風誼凜然蓋其孤騫豪邁殆若列子御風不塵土
要皆根源乎仁義忠信則其高明通敏之才允可羽翼
天下藹瑞明時回視其向日舉業文章之馳聲士苑者
殆鯨鯢之鉤驪珠之斧珊瑚之網之在溟渤茫茫之內
而尙足以指視而擬議之耶嘉靖丁亥穀旦傳一本于
鄉評士論之公爲之而區區好德懷賢之私亦竊因以
自附但恨學殖荒落紀次疏漏則又不能不仰塵大手
筆之刪潤以爲後來評隲尙論之地也兼之先生中遭
忌嫉廻翔遠方其功業猶苦未究而晚節未露則固未
能逆要而定故但依倣近時僉憲泰和陳賞布政泰和

梁梁各撰楊東里公小傳體例云爾矧今大明中興臨
下有赫國是漸定公論且日信而先生凜然風操折之
不同益勵孤貞勤勞中外計亦簡在淵衷峻陟柄用而
風望聲光將由是而愈益鏗錙錒炳煥有可懸而斷者矣
則其功成結局之間抑豈無絕世名家如四門助教永
州司馬者流通古今而譽盛德允作史館太常節惠易
名之所有事耶京不肖而老蓋不惟才力之無能爲役
亦恐年歲不遑及矣臨文愧悼搔觚自失者久之

年譜

孫祖名述

憲宗成化十九年癸卯正月初八日公生於縣市南隅
太平坊之舊第

甲辰公二歲甫週日贈君羅百具以觀取舍獨筆硯兩
撫摩焉咸異之時贈君夢五色青鸞集庭遂命名曰雲
鸞

乙巳公三歲

丙午公四歲

丁未公五歲

孝宗弘治元年戊申公六歲出就外傳日數行下日兼

十餘人誦師大異曰三年吾藍矣

巳酉公七歲患痘有周塾師愛誦道德家言夜半見巨人伸兩足抵屋角師再拜囑曰得毋雲鸞之天星乎仰視不見

庚戌公八歲

辛亥公九歲習毛氏詩卽能屬文太僕袁公宏過塾中值師他出諸兒驚避去公朗讀如故袁公試之曰客至而踞禮乎對曰奉師命讀書不奉揖客音吐宏壯顏色不變袁公大奇之清軍范公素異公愆太僕妻以女王子公十歲受業袁公之門屬文不事斤削袁公益珍